

國朝先正事略

國朝先正事略卷之十一 名臣

平江李元度次青纂

趙襄忠公事略

子敏恪公宏燦

恪敏公宏燮

勇畧將軍姓趙氏名良棟字擎宇一字西華甘肅甯夏人少倜儻仗策從戎順治二年隨英親王大軍入關中受知於總督孟喬芳署潼關守備從征賀珍武大定等賊又從定甯夏叛兵之變署屯田都司四年平河西回亂又單騎擒偽總兵丁國棟擢游擊十三年以經畧洪承疇薦隨征貴州雲南任督標副將康熙元年擢雲南廣羅鎮總兵先後勦平馬乃隴納水西諸苗獫有功時吳三桂專制滇南所補用官吏詔部臣不得掣肘於

是三桂調公貴州平遠鎮令進勦水西公方丁外艱且知三桂有異志力辭三桂怒欲劾誅之總兵沈應時爲巽詞以解四年水西平乃聽終制三桂未反時日以牢籠人才爲務惟公不爲所用八年補大同左都督十一年調天津十三年三藩反叛鎮吳之茂王輔臣等應之甯羌惠安兵變殺提督陳福猖獗甚十五年甘肅提督張勇薦公才畧過人

聖祖命公提督甯夏馳傳往鎮撫之議者疑公陝人不可信公見

上詞氣激昂請移家口居京師得一意辦賊

上壯其言尋賜第時官兵敗散屯堡荒廢公沿途曉示招官

歸原汎。兵歸原伍。捕斬首亂四人。餘不問。邊境遂安。時大將軍  
圖海督師圍平涼。輔臣降。慶陽固原俱下。詔公與將軍王進  
賢並聽圖公調度。公駐朔方。四載。念關中粗定。而漢南巴蜀尚  
阻。聲教疏。請率步兵五千。獨當一路。進取漢中。興安規全蜀。  
詔下軍前王大臣集議。僉言大軍宜分四路進。需兵五萬人。公  
曰。兵貴精不貴多也。既而涼州提督孫思克言綠旗不可用。請  
俟來春多調滿洲兵並進。詔切責之。乃以十月定師期。圖公  
及將軍佛尼勒征興安。孫公及將軍畢効克圖征畧陽。王進賢  
及總兵朱雅逢征鳳陽。公獨將五千人征徽縣。十月破密樹關。  
擒賊將徐成龍。遂取徽縣。時孫公甫至。諸州公已擊走吳之茂。

復畧陽分遣裨將趨陽平關。徇沔縣。王公亦復鳳縣。定漢中府。公會之於甯羌。各奏捷。詔授公勇畧將軍兼甯夏提督。公與王公分路進師。晝夜兼行。抵白水壩。時康熙十八年除夕也。壩爲川江上流。與昭化唇齒。俗號鐵門坎。賊防禦甚力。公與賊夾江而陣。江流洶湧。無舟楫。將士有難色。公下令曰。元旦渡江。大吉。視吾馬策所指。後者斬。黎明。公騎驕馬率麾下五千人橫刀渡江。江水爲萬馬騰簸。波濤盡立。呼聲震天。賊連發礮傷數十人。無敢回顧者。賊大驚曰。此老將軍軍令如山。不可抗也。方搏戰。天忽風吹馬如吹船。頃刻抵岸。斬賊將郭景儀等。餘賊崩奔。追擊之於青山石硤溝。厯舊州。明月江。戰屢捷。僞將軍汪文元。

偽巡撫張文德等降。遂克成都。公入城。秋毫無犯。偽官及逆兵數千。疑懼不自安。公悉以迎降。奏釋收金銀印二百六十。偽劄子奏繳之。公出師時。曾條上調兵運餉諸事宜。請兩路收川上報可。至是。王公亦復保甯。東西川以次收復。

天子降溫旨勞軍。賜御書題額及弓矢橐鞬名馬之屬。詔授公兵部尙書兼右都御史總督雲貴。將軍如故。公聞命。謂甯夏提督有代者。則鎮兵不能隨征。因疏辭總督。

上弗許。會部議甯夏宜如舊制設總兵。詔卽以公子廕生宏燦爲甯夏總兵官。隨軍進勦。公遣將西徇雅州。復象嶺。建昌諸衛。東徇敘州。復納溪。永甯等縣。且奏滇黔恃蜀爲捍蔽。今蜀已

得而三桂又新死。宜乘機急進。請諭趣湖廣兵速取貴州。廣西兵速取雲南。并勅陝西四川籌餉濟軍。剋期進勦。一自保甯出永甯。達雲南。霑益州。一自成都出建昌。達雲南。武定府。詔下在事諸大臣定議。尋議川楚粵各路兵約期並進。將軍吳丹出永甯。公出建昌。會吳世璠遣胡國柱夏國相等陷永甯。犯瀘州。敘州復寇建昌。公檄總兵朱衣客援建昌。失利。退駐雅州。建昌陷。公疏劾吳丹朱衣客。詔吳丹解任。以佛尼勒代之。衣客逮訊。二十年三月。公遣宏燦及總兵李芳述等追勦國柱於觀音巖。五月破關山象嶺。渡瀘江。敘瀘永甯賊皆遁。七月取建昌。乘勝渡金沙江。九月抵滇。時貝子彰泰軍滇池。將軍賚塔軍

黃草壩滿漢兵十萬有奇圍城九月未下公至卽詣貝子陳三策其一先破外護使賊匹馬不得出乃可招降其一結營遼遠賊得番息法當移軍逼之其一降者宜分別收養不宜盡發滿洲爲奴貝子不悅以滿洲語相駁詰公漢人不解滿語張目牴牾幸公已奏聞詔下悉聽公策乃率所部親冒矢石取玉皇閣進逼新橋賊據橋死拒公伏馬兵於南壩兩岸分步兵爲三隊營壕牆外持大刀督陣夜二鼓攻橋賊殊死鬪逆渠郭壯圖親搏戰三進壕牆而伏兵三起應之復以計從上流濟師列炬如星礮雨下賊敗走公奪橋追至三市街再敗之賊猶未曙也黎旦入東南二門壯圖自焚世璠自殺餘黨悉降自公至軍八



口而雲南平賊踞滇久私斂充牣諸將爭取子女玉帛惟公飭所部不以一騎入城既告捷卽疏請陞見移師曲靖以待命又訪得吳逆司筦庫者以藩宮簿籍進呈其後乾沒者皆敗而三桂寵姬一歸將軍穆占一歸總督蔡毓榮者皆

上聞惟公皦然不滓其遠識確守有古大臣風烈焉初朱衣客之逮訊也具疏自辯咎公與兵少後應復不至時王進寶亦上疏謂建昌之陷咎在公公因復劾衣客且謂其辯疏由進寶所爲

上以趙良棟王進寶功績並茂所有互訐之疏均發還不問其遲於救援誤軍機仍察議如例於是部議衣客論斬吳丹奪職

籍沒公奪職並得旨從寬二十一年以將軍管鑾儀衛事公性伉直氣陵其上首建取蜀議孫思克吳丹等咸忌嫉之吳故大學士明珠從子怙寵而貪公劾之及公復建昌追賊至大渡河

上命公乘勝趨滇而大將軍貝子屢檄公先追獲國柱再往公不從攻新橋兵少公爭之許以南壩相救及鏖戰救不至公積不平入朝屢忿爭於明珠前珠雖怵以好語然以吳丹故心弗善也二十二年公疏述滇蜀戰功下王大臣核議以公失機建昌應以功抵罪止敘錄隨征將士加宏燦及芳述左都督銜公尋乞骸骨歸二十五年夏

上念公克雲南時恪守法紀廉潔自持優詔嘉獎復將軍總督原銜二十七年入朝自訴戰功并隨征將士多屈抑得旨授騎都尉世職三十年厄魯特噶爾丹蠢動大軍駐朔方詔公以在籍老臣預議軍事三十三年禁旅出塞公偕行用私財佐軍既還召入朝明年復上疏自敘戰功甚苦爲大將軍圖海彰泰所隱蔽且追咎明珠

上責其器量褊隘還其疏仍勅部優敘部議授爵三等子詔晉爲一等公願畱京師乞賜田宅御史龔翔麟劾公驕縱恃功越例乞請當議罪

上鑑其年老家貧優容之賚白金二千兩令歸里三十六年正

月

聖祖聞公臥病。溫旨存問。賜人薺鹿尾時。

上方決策西征。擬就詢方畧於里第。而公遽以疾薨。年七十有七。比車駕次榆林。諭閣臣曰。勇畧將軍趙良棟。偉男子也。

爲國家宣力。厥功甚茂。倏以疾逝。朕深憫焉。茲師抵朔方。道經其門。可令皇子臨視奠醊。次日。皇子臨喪。舉哀賜奠如禮。閏月復頒諭祭文。遣大臣致祭。賜諡襄忠。次子宏慶襲爵。公結髮事戎行。五十餘年。大小戰數百。未嘗敗衄。行軍有紀律。所過無秋毫犯御下。嚴而有恩。觸法者雖小必罰。有才畧堪任使。輒疏薦之。甘苦與士卒共。入蜀之役。裹糧涉險。轉戰七千餘里。咸

樂爲盡死。故所向有功。功成後。憇閒者日。眾賴。

聖祖知公深。營格眾議。曲賜維護。雍正八年。詔入祀賢良祠。

乾隆三十二年。

上念公功。其一等子爵。特予世襲罔替。四十七年。詔晉一

等伯。仍世襲罔替。長子宏燦。康熙四十五年。由廣東提督擢兩

廣總督。召爲兵部尙書。五十六年薨。賜諡敏恪。次子宏燮。由

天津道襲一等子。康熙四十四年。遷直隸巡撫。五十四年。詔

襲其撫直十年。實心任事。旗民輯睦。盜賊稀少。特加總督銜。六

十一年薨。賜諡恪敏。子之璧襲爵。以宏燮在任時虧庫。

上命宏燦子之桓。以郎中署直隸巡撫。料理未完事件。雍正元

年解巡撫任。特旨寬免追銀之璧官至兩淮鹽運使

王忠勇公事略子用子

公諱進寶字顯吾甘肅靖遠人初隨陝督孟喬芳平河西叛  
授守備隸甘肅總兵張勇標下順治十一年張公調經畧右標  
總兵公隨往湖南十五年進征貴州師次十萬谿懸崖千仞僞  
安西王李定國使僞都督羅大順扼據險要公率眾攀崖直上  
搗其巢賊眾潰以功遷游擊康熙二年張公任甘肅提督奏授  
提標游擊尋隨張公討平西羌授參將時羌人乞駐牧大草灘  
張公用公議持不可於是卽單于城故址建永固城以公爲副  
將駐之十二年擢西甯總兵明年冬陝西提督王輔臣叛應吳  
三桂陷蘭州斷浮橋以拒河西兵公帥師進討十四年二月師

抵黃河。公以革囊結筏。自蔡灣夜渡。抵皋蘭龍尾山。大破賊眾。擒僞游擊李廷玉等。乘勝東拔金縣。定安。復西攻臨洮。會大雪。偵賊無備。遂襲破之。輔臣遣使持吳逆僞劄來招。公立奏聞。得旨嘉獎。加銜左都督。四月。進攻蘭州。賊兵千五百人出東門迎戰。公率眾奮擊。自辰至午。擒斬過半。別遣兵分路勦殺。賊退保不敢出。我兵環圍之。斷賊糧運。六月。賊造筏百餘謀潛遁。公分兵沿河伺擊。賊勢蹙。乃遣人招諭僞總兵趙士昇等。率眾降。遂復蘭州。十五年正月。詔嘉公懋著勞績。克殫忠誠。授陝西提督。兼西甯總兵。暫駐秦州。時僞將軍王屏藩吳之茂互爲聲援。窺伺秦州。二月。之茂率賊眾進距北山。絕我餉道。公會將



尼勒進。勦大敗之。生擒僞總兵徐大仁。復遣兵馳擊。敗賊眾於羅家堡。又敗之鹽關。賊復集潰眾萬餘。築壘排椿。據鐵葉硤紅山堡。潛出賊兵。接運芻糧。公遣兵撲勦。大敗賊眾於牡丹園。擒斬僞官。獲糧械無算。五月。撫遠大將軍圖海統兵進牧平涼。輔臣勢窮。遂引四川叛鎮譚宏爲援。連兵犯通渭。公急擊破之。降其僞官。復靜甯州城。輔臣尋詣圖公軍前降。六月。公次樂門。甫駐營。之茂遣賊眾來犯。公統兵環擊。擒其僞總兵游擊等。斬之。復與將軍佛尼勒合兵攻擊。屢戰克捷。之茂僅以十餘騎逾北山遁走平涼。固原悉定。大將軍奏陝西提督。原駐平涼。固原與平涼密邇。據秦省形勝。宜令公駐鎮。詔公移駐固原。兼攝固

原總兵事敘功議授三等男。論曰王進寶宿將重臣矢心報國兼以訓練士卒忠義素孚故能身先行陣所向克捷朕甚嘉焉可從優加一等男授舊武將軍仍兼提督平涼諸路軍務十七年公復慶陽斬偽總兵袁本秀及賊眾二百餘人十八年冬公與提督趙良棟等分兵四路規復漢中公偕總兵費雅達由棧道進先是公奏請令子用予率兵往勦俾練習戰陣

上允其奏授用予副將公復疏言臣父子均在秦中例應迴避詔曰王進寶父子統兵誅勦賊寇保守封疆著有勞績王用予仍畱與伊父同守秦中要地用予字公安每戰先登陷陣所向披靡至是從征寶雞公遣用予擊賊紅花埔大敗之復鳳縣兩

當縣進軍武關。令用予率偏師繞出關後。而自以大軍當其前。賊腹背受敵。皆潰走。擒僞總兵羅朝興等。奪雞頭關。直抵漢中。王屏藩率賊眾自青石關走廣元。公復遣兵躡擊。降其僞將軍楊永祚。僞總兵孫啟耀。盡復漢中地。得旨褒獎。時趙公亦恢復畧陽。命公與趙公進定四川。並敕將軍吳丹、鄂克濟哈率滿洲大兵分繼其後。公自青石關至神宣驛。聞賊駐朝天關。督兵躍馬直前。賊驚竄走。疾馳至廣元。斬賊無算。遂復其城。十九年正月。分兵三路趨保甯。距城二十里。當孔道。而軍賊眾二萬來犯。公率兵奮擊。大破之。追至錦屏山。連拔賊壘。奪浮橋。直薄保甯城。用予斬門突入。公麾兵繼進。屏藩計窮。與僞將軍陳

君極皆自縊之茂及僞將軍張起龍僞總兵郭天春等十  
並就擒保甯平別遣兵克昭化劍州蒼溪蓬州廣安合州西充  
岳池等州縣時趙公已復成都授雲貴總督詔公駐守四川  
擢用予松潘總兵公尋以疾乞休命回固原就醫以用予駐  
保甯暫代尋改用予爲固原總兵父子同建節鉞海內榮之論  
者謂公舉不避親用予不負所舉與朝廷之度外用人可稱  
三善云當是時趙公以進征滇黔奏調川陝各營兵隨征固原  
兵亦多檄調公以本標兵宜畱鎮守奏停檄遣詔允之未幾  
賊將胡國柱夏國相等由黔入川譚宏彭時亨復叛永甯建昌  
繼失趙公劾公擁兵不救公以臥疾固原疏辨且言建昌之陷

咎在良棟。詔公馳赴保甯。於是公復統固原兵駐保甯。是年敘功。晉三等子。用干加左都督。授雲騎尉。世職。明年賊將馬賓犯敘州。用予擊敗賊眾。恢復納溪江安仁懷合江等城。降其偽將軍何德成等。寶甯雲南用予駐敘州。尋奉詔率所部兵馳赴永甯駐守。二十一年滇黔既平。

上詔公及趙公至京。命王大臣發還前此互訐奏章。宣諭臣功績並茂。宜保護矜全。其不諳大體。私忿攻訐。概不究問。事詳趙翼忠傳。賜服物。仍還鎮。二十三年五月疾甚。再請休時。用予已調太原總兵。命馳驛偕太醫視疾。且調用予甘肅總兵。便侍養。明年八月薨。年六十。得旨。王進寶。性篤忠貞。威

望素重。率兵征勦賊寇。勇畧兼優。動猷懋著。可。贈太子太保。  
予謚忠勇。賜祭葬如典。雍正十年。詔入祀賢良祠。初次襲  
爵者。卽用予。合其軍功議敘。拜雲騎尉爲三等子。乾隆三十三  
年。詔世襲罔替。

孫襄武公事略

公諱思克。字藍臣。漢軍正白旗人。父成功。三等男。公其次子也。初任主府護衛。順治八年。授刑部理事官。十年。遷參領。十三年。隨大軍由湖南進征貴州。雲南。屢立戰功。康熙二年。擢甘肅總兵。五年。與提督張公勇合疏言。厄魯特蒙古。墨爾根。台吉等。受國厚恩。狼心未化。屯兵祁連山上。縱牧內地之大草灘。去冬。不遵撫慰。抗拒於定羌廟。爲官兵擊退。猶不悛改。聲言糾合部落。分三路入犯。狡謀叵測。宜速創懲。方可議修築。而嚴守備。得旨。下廷臣密議。以兵端不可輕動。令嚴防邊境。仍撫恤番人。以得其心。於是公偕張公修築邊牆。自歸部口。西水關起。至嘉峪。

關止守禦。訖然六年。公至南。出各隘。日相度衝險。撥兵固禦。十三年。諭獎公効力邊疆有年。下部議。加右都督。是冬。平涼提督王輔臣叛。應吳三桂。臨鞏諸郡相繼從逆。蘭州危甚。公遣游擊劉衍等移兵協防。自統兵進攻苦水洋。值蘭州已失守。乃駐紮西尋回涼州。十四年夏。督臣哈占定議。南北兩路兵同時進剿。將軍張勇總兵王進寶等從金城關渡河。規復蘭州。公自涼州領驍兵由河壩紅水蘆塘索橋入跡不到之草地。結筏渡河。規復靖遠一路。周圍二百里城堡皆已納款。正擬趨固原。會大兵於平涼。適西海蒙古墨爾根台吉等已從山口入內地。與官兵拒敵。勦將陳達傷亡。公畱兵守靖遠。由草地渡河回涼州。保



河西根本重地。墨爾根台吉引眾出口。而甘州所屬之高臺與紅崖梨園等堡。有黃番頭目入口搶掠。合數千餘騎。攻圍暖泉順德諸堡。公卽自涼赴甘。番族始遠竄。因將軍約期會勦。王輔臣復渡河而東。草地往來。兵丁勞苦十倍他鎮。疏請恩加犒賞。得旨往來防勦。具見忠盡。兵丁犒賞有差。閏五月。同張公勇等圍鞏昌。時定西大將軍貝勒洞鄂圍秦州。城中賊眾屢出犯逆。黨自四川至者。結寨秦州南山上。日益猖獗。貝勒檄公率兵三千駐秦州。西賊勢乃窮。僞總兵陳萬策僞道馬肇升赴公營乞降。僞總兵巴三綱遁。遂復秦州南山。賊潰竄。公同振武將軍佛尼勒迫擊於閭闕。敗之。乘勝克禮縣。復敗賊於西和。奪門。

入斬僞官三十。清水、伏羌等縣皆復。乃赴鞏昌。會勦遣降將陳萬策等入城。曉諭鞏昌十七州縣皆降。河東平定。八月。會勦平涼。公由靖甯、隆德進。擊走賊將李國樑。陣斬五百有奇。生擒僞守備一千總二復。靖甯州進次華亭。過六盤。士冒雨忍飢攀援而上。賊莫敢拒敵。僞副將高鼎率兵千餘迎降。遂抵平涼。與大軍合。十五年。貝勒奏大兵圍平涼。半載。賊屢出犯。總兵孫思克徒步當先。敗賊於南山者四。敗僞總兵蔡元於城北者四。又九處設伏。敗賊於南門。僞總兵艾姓引賊二千掩襲掘壕。思克揮兵急擊。賊退而復逼者三。俱敗之。勦涇州。白起寨。思克先至。寨下遣領旗李錦先登擒僞副將李茂。斬賊目數千。又敗賊於南。

山甲子峪及馬營子麻布嶺諸處宜酌示鼓勵得旨優敘五月隨撫遠大將軍圖海破賊於虎山墩公臂受重傷猶奮戰不輟輔臣窮蹙降公還涼州詔曰自逆賊變亂以來奸徒附和人心不無動搖張勇王進寶孫思克一聞蘭州之變卽率兵進勦收復城邑厥功甚偉及大兵攻取平涼復同心協力身先行陣所向克捷朕甚嘉之孫思克可授涼州提督並一等輕車都尉十月公疏言虎山墩之戰賊砍臣右臂傷筋及骨已成殘疾乞假解任回旗得旨卿久鎮巖壘勦除賊寇屢建戰功新簡提督正資料理不必求罷十六年敘功晉爵三等男時噶爾丹侵擾西北諸蒙古突入沿邊各寨公與張公勇以兵驅逐乃徙

去十八年七月

上勅圖公。調公與提督趙良棟等勦賊漢中。興安圖公奏九月  
初旬。四路進發。公與將軍畢力克圖由畧陽進。會有詔因京  
師地震。令內外大臣各抒所見。公疏請今秋暫緩進兵。俟來春  
二三月間。多調邊兵圖進取。未晚。

上命學士拉薩禮至涼州。宣諭詰責。公乃自引罪。拉薩禮還  
奏得旨。俟事平日再議。十一月。公與畢公敗賊眾於階州。及  
文縣成縣。進駐沔縣。詔公還涼州。尋移駐莊浪。防守河東河  
西。二十年。慶陽賊渠耿飛倡亂。糾叛番犯河州。公與張公勦平  
之。二十二年。追論前奏緩進兵罪。奪三等男爵。及提督。仍畱總

兵任二十三年。遷甘肅提督。二十八年。北養生番犯內地。公督兵截阻。斬獲甚眾。二十九年。學士達瑚。郎中桑格。出使西域。歸至嘉峪關外。爲西海阿奇羅卜藏所劫。公聞報。卽遣遊擊朱應詳計。賺其宰桑質於關內。始反我。使臣別遣副將潘育龍。遊擊韓成等。搗其巢穴。斬馘四百有奇。阿奇羅卜藏遁。後遣人赴西海詰問。各台吉責償所掠物。各台吉懼。罄阿奇羅卜藏所有以償。公奏請免其窮治。諭嘉公盡心籌畫。區處合宜。如所請行。三十年。疏言肅州一協。去甘州五百里。涼州千里。極邊之地。外逼西海。北養哈密諸部。內則番族插帳。與民雜處。所設副將。威望不尊。兵不滿千。難資控禦。請設總兵一營。兵三千。以固邊圉。

消窺伺。又甘肅地瘠民貧。萬一征調雲屯。軍食何由濟。宜於河西要地屯積糧草。備戰守。但本地無糧可買。輓運復恐勞民。惟捐輸是賴。而本地富民無幾。請無論本省別省官民一例捐納職監及加級紀錄。俟邊儲稍充。卽停止。疏下九卿議從之。三十年。詔嘉公久著勞績。加太子少保。予騎都尉世職。五月疏報遣總兵潘育龍等追來降復叛之番眾於庫列圖嶺。斬級四十餘。擒百二十人。請將叛首齊奇克正法。而宥其從人。

上免齊奇克死。令安插內地。有旨加振武將軍銜。三十二年。命內大臣卞領京營兵至甯夏。同公駐防。卽以公爲參贊。探噶爾丹聲息。三十五年二月。

上親征噶爾丹出中路。命撫遠大將軍費揚古由西路進公。率陝西兵出甯夏至翁金地與大將軍會五月。

上駐蹕克魯倫河噶爾丹聞。御駕親臨倉皇遁去大將軍邀擊之於昭莫多公率綠旗兵居中與東西二軍合力迎戰自未至酉斬級俘獲無算追奔三十餘里噶爾丹引數騎遠竄捷奏至奉。旨褒獎。詔起京。命侍衛迎勞。賜冠服等物並。

御製詩箋有鷹揚資遠畧宿望在西陲之句入覲暢春園。賜御書綏懷堂額及端罩四圍龍補服孔雀翎朝帽朝衣朝珠鞍馬。命赴肅州駐兵探噶爾丹往哈密聲息三十七年敘功加雲騎尉世職三十九年二月以病乞休。遣御醫及兵部官往。

視仍命畱任調理。是月薨。詔從優議卹。贈太子太保。賜祭葬如例。諡襄武。櫬還。命皇長子前往奠醑。賜鞍馬銀二千兩。諭廷臣曰。聞孫思克喪回時。自甘州至潼關。沿途軍民無不號泣相送。若平昔居官不善。何以得此。誠可謂將軍矣。復諭兵部曰。孫思克謀勇素裕。久鎮巖疆。允稱良將。可給還所奪世職。部議并爲一等男。加一雲騎尉。以其子承運襲。雍正十年。入祀賢良祠。乾隆三十二年。詔以公當吳三桂叛及噶爾丹犯邊時。懋著勞績。其一等男爵。令世襲罔替。



梁敏壯公事略

二

公諱化鳳字岐山陝西長安人順治三年武進士四年授高山衛守備五年大同總兵姜瓖叛公從英親王阿濟格攻克陽和城擒賊將郭二用陞大同都司時大同左衛汾澤諸郡邑賊眾蜂起六年公破大同北窰溝生擒賊將李義張豹二月攻渾源州克三堡破賈莊城擒賊帥王平進攻左衛下之論功加都督僉事以副將推用五月攻太原賊眾殊死戰公被重創督攻益力執其僞巡撫姜建勳六月攻汾州進薄孝義縣穴地置火藥藥發城圯拔其北關賊帥沈海來襲大營公破走之連下十餘寨介休平進攻祁縣望風悉降十月攻太原延安皆下之進逼

沈海於九臺火其寨海降遂乘勝進定澤州七年殲餘寇於牛鼻寨晉地悉平八年授蕪湖參將勦石皿鷺鷥二湖盜十二年遷甯波副將海寇張名振犯崇明之平洋沙公署蘇松總兵事至則遣都司談忠逆戰名振復圍高橋公親馳援勦敗其眾十三年實授蘇松總兵公以平洋沙懸隔海中爲賊佔聚因沿海築壩長十餘里引平洋沙入內地且灌田千頃俾斥鹵盡爲膏腴初鎮兵皆寄居民屢公始建營房處之兵民稱便海寇鄭成功率眾號百萬先犯崇明公擒其間諜督兵逆戰獲賊渠餘眾潰遁十六年七月成功以大艦陷鎮江瓜洲直犯江甯當是時駐防重兵皆移征雲貴城中守備虛提督馬進寶陰通寇擁兵

觀望成功。移檄遠近。連下徽甯池太計府四州三縣二十四維揚常蘇旦夕待變。東南大震。軍報阻絕。

世祖幸南苑。方議集六師。親征公。率所部兵三千人疾抵江甯。援勦登高審視。見敵營不整。樵蘇四出。甲士浮後湖而嬉。乃率勁騎五百。夜出神策門。先破其一營。以作士氣。次日分兵出儀鳳鐘阜二門。身先督戰。以三路攻其前。而騎兵繞出山後夾攻。拔賊巨纛。毀其本寨。命勇士踞高發巨礮。乘勢奮擊。擒偽總兵余自新等賊奔潰。是夜偽帥連營屯白土山。公尋由陸路進兵。賊列陣迎戰。公督諸軍自下仰攻。生擒偽提督甘輝等。賊大敗。奔北。公追斬甚眾。別遣將燒賊船五百餘艘。賊眾自相蹂躪溺。

死者無算。江南遂通。成功敗遁。入海。公尋遣將防。崇明賊果薄城下。適公兵自江甯回。聲勢相接。括民舟出白茆港。絕流迅擊。賊復大敗。成功僅以身免。十六年授輕車都尉。賜金甲貂裘。十七年擢蘇松提督。加太子太保。左都督。公疏言。蘇松濱海要地。延袤八百餘里。原設標兵僅二千餘。請酌調省兵三千八百。立爲中左右前後城守六營。以資捍禦。下部議行。十八年秋。上特詔曰。海寇入犯江甯。時梁化鳳擊敗其眾。繼援崇明。保全孤城。厥功懋焉。其再敘戰功。示鼓勵。遂晉爵三等男。準襲八次。八月以病乞休。溫旨慰留。九月授江南全省提督。時議者以海寇初平。遊氛未靖。欲立界遷沿海居民於內地。公曰。沿海設

兵以所棄地畝賦之則國既足兵民無廢業遷界何爲奏上  
詔從其言康熙元年丁父憂令在任守制十年十一月薨於位  
賜祭葬如典禮贈少保諡敏壯十二年

仁皇帝巡幸西安遣官奠其墓子鼐蔭生康熙十三年奏改武  
職授督標左營遊擊時漢中興安並叛應逆藩吳三桂鼐駐防  
黑水峪十四年漢中賊千餘聯結叛鎮王輔臣由祥峪口入三  
路阨踞山險鼐率兵誘至觀音堂奮擊大敗之十七年調興安  
游擊管副將軍事十八年征漢中由西路出富家河偵賊二千  
餘踞桐子關鼐率兵衝擊自午至酉殲賊無算復移師敗賊於  
閭王橋興安附近城邑以次恢復十九年勦川東叛鎮譚宏進

兵羅石橋等處大敗賊眾擒賊將衛仰武等遂復達州加都督  
僉事二十一年遷袁州副將二十六年遷江南水師總兵四十  
年擢福建陸路提督四十五年擢福建浙江總督四十六年  
上南巡賜御書旗常世美額先是兵部尚書金世榮爲總督  
謂出洋巨舟易藏盜奏定漁船禁用雙桅商船飭令改造樑頭  
以丈有八尺爲度逾制者罪之鄒旣蒞任卽疏言商船不許過  
大慮其越出外洋或至爲匪也然船大則商人之資本亦大不  
肯爲匪且不容無賴之徒操駕自定例改造所費甚鉅皆畏縮  
遷延其已改造者僅求合於丈有八尺之樑頭而船腹與底皆  
仍其舊是有累於商而實無關海洋機務及召對復面奏

船不僅捕魚兼資貨物貿易非雙桅難以出洋

上命大學士等議弛其禁四十七年疏言湖州所屬逼近太湖有烏程之西山港新涇漚等處及長興之白茅花礪諸港計七十有二港漚溉田畝無算宜開濬深廣於流入太湖處建閘六十四座隨時啟閉其石門之聖塘廟至玉溪鎮秀水之西利北利端平三橋嘉善之西門渡船頭張涇匯楓涇鎮等處爲出水要道均宜開濬估計需銀四萬兩有奇此外淤淺之三府屬支河溝蕩勸民開濬民自樂從無煩動帑疏入下部議如所請得旨支河港蕩淤淺若勸民開濬或地方官借端私派厲民其悉令動帑興工四十九年母憂歸五十二年赴京祝萬壽予蔭

一子壽以疾乞歸里。是年十一月薨。年六十有一。遺疏至。優  
旨下。所司議卹。賜祭葬如例。



楊敏壯公事略

公諱捷字月三先世家揚州以軍籍爲義州人公初爲明裨將順治元年率眾投誠投山西游擊二年尙嵐州土匪高堯英等聚眾標掠公奉巡撫馬國柱檄擒斬賊眾毀其巢遷中軍參將擢副將四年大兵旣定廣東詔公率宣化大同兵三千移鎮五年二月次池州值江西總兵金聲桓廣東總兵李成棟相繼叛征南大將軍譚泰請公駐防九江會勦聲桓

世祖皇帝允所請授公九江總兵官旋率兵復都昌獲僞官余應甘等斬之江西平予雲騎尉世職十年隨靖南將軍喀喀穆勦滅廣東叛鎮郝尙久復潮州十一年改陝西興安總兵經

署洪承疇疏留原鎮。是年加右都督銜充福建隨征右路總兵。官十二年。晉左都督。時海賊鄭成功肆擾福建郡邑。公請剋期增修漳浦城垣以固守禦。嘗勦賊銅山諸處。所向克捷。十六年擢江南提督。會鄭成功突陷鎮江。窺江甯。特加公太子少保。充江南隨征左路總兵官。統兵三千防勦。十七年奉旨駐揚州。防江北要汛。十八年署廬鳳提督。尋調山東提督。駐青州。土賊于七敗竄入海。公緝其黨五十餘人。皆伏誅。康熙四年併山東總督於直隸。移提督駐濟南。七年河南提督許天寵以裁缺改山東。命公候缺。九年天寵遷鑾儀使。公仍補原官。十二年調江南提督。十五年海賊鄭錦犯乍浦。公遣參將白可受等往。

勦獲其船俘斬無算十七年賊犯漳州陷海澄

上以公謀勇兼優成效素著調福建提督兼轄水陸特晉少保兼太子太保並諭攜綠旗兵之願往者隨征公因疏言臣前隨征福建勦賊雲霄銅山閒深知閩兵不能力戰用命臣自任江南提督召募壯健至松江訓練有年堪資戰守擬選三千名並擇游擊守備數員往備任使

上允之公至福州聞賊犯泉州卽統兵趨惠安賊不敢抗皆潰遁遂復惠安城僞總統劉國軒見我軍甚盛因斷洛陽橋畱賊數千及船百餘拒守而自集海船爲遁計又以賊三千餘踞陳山壩阻我師公遣游擊李璉等襲破陳山壩而令總兵黃大來

與副都統禪布等會師洛陽橋兩路夾擊以礮破其船賊大敗遁去泉州平時賊將王一鵬復窺惠安公令總兵張韜往剿捕斬略盡餘黨葉明紀朝佐等出沒德化永春間僞總兵蕭武等聚艘泊湄州窺興化公復遣將防守策應而自移師赴漳州同副都統吉爾塔布等敗國軒於江東橋又分兵屯柯坑山鳳山萬松關諸險隘別遣將守榴山寨以扼衝要先是公甫莅任卽請設水師提督使已得盡力陸路至是得旨楊捷自膺簡任以來屢著勞績可授昭武將軍管福建陸路提督事十八年國軒以賊眾劫榴山寨並欲奪江東橋公會平南將軍賚塔等分兵爲兩翼左右夾擊大敗之於下坑山及歐溪頭斬賊千餘獲

甲仗無算。十九年國軒糾賊屯獅子山。又聯絡遠近賊寨爲聲援。公親率精銳勦平烏嶼諸寨。復以高浦與廈門相對爲海濱要地。畱營防禦。斷賊歸路。而自與總督姚啟聖總兵黃大來等分下王洲三汊石碼等處。十九寨復統兵進攻海澄。僞總兵蘇侃以城降。遂乘勝取廈門。賊聚艦迎敵。我師以巨礮毀其艦。奮兵疾擊。賊溺斃者無算。餘黨相率投誠。金門廈門悉平。國軒自銅山竄臺灣。公疏請回駐泉州。得旨俞允。是年九月以老病乞罷。命仍任江南提督。諭曰。卿效力巖壘。功績茂著。以閩地溼熱。與卿病體不宜。調爲江南提督。不必求罷。明年晉三等輕車都尉。準襲四次。公駐松江年久。以病乞休者再俱奉溫

旨慰留。二十九年薨於位。年七十有四。贈太傅諡敏壯。孫鑄襲職入籍揚州衛。

施襄壯公事略 于世綸 世驥

公諱琅字尊侯號琢公福建晉江人貌魁梧膂力絕人少從戎時主兵者募壯士有鼎重千鈞公從容舉之環步數巡仍返其所唐王立福州授左衝鋒嘗統偏師迷入榛莽有虎導之行始得出眾見公與虎偕爭趨救公笑曰微虎我何由至此眾大驚嘗隨閣部黃公道周出仙霞關知事不可爲獻奇策黃公曰君言是也顧吾大臣仗義守死而已倘有他奇策可以匡時君等行矣勉之遂寄食海上爲明總兵鄭芝龍部將國朝順治三年大軍定福建公隨芝龍投誠遂從大軍征廣東勦平順德東莞三水新甯等縣芝龍歸京師其子成功竄踞海島屢誘公助

已公不從囚公館中欲殺之公以計脫宵奔緣山行匿洞中追者數十騎至火光燭天公所匿洞忽生棘刺索者不能得成功歎曰吾甯一患於中原矣公父大宜弟顯暨子一姪一遂被害十三年公隨定遠大將軍濟度敗成功賊眾於福州授同安副將破灑州壘擒其騎將降萬餘人遷總兵官康熙元年擢水師提督時成功已死其子錦糾眾犯海澄二年公遣將擊賊於海門斬賊將林維獲其船十月靖南王耿繼茂總督李率泰等攻克廈門賊眾遁公率所募荷蘭夾板船邀擊之殪賊千餘乘勝克浯嶼金門二島加右都督三年加靖海將軍七年密疏言鄭逆負嵎海上宜急勦若恣其生聚是養癰也疏上召至京面



詢方畧。公奏賊兵止數萬。戰船數百。若先取澎湖。以扼其吭。賊且立絀。倘仍負固。則重兵泊臺灣港口。而別以奇兵襲南路。打狗港及北路文港等處。賊分則力薄。合則勢蹙。臺灣計日可平。事下部議。以風濤莫測。難以制勝。寢其奏。乃裁水師提督。授公內大臣。隸漢軍鑲黃旗。十九年。學士李公光地與公語及順治十六年海寇犯江甯事。李公曰。賊苟不頓兵城下。驅而徑前者。是誠可危。公笑曰。宜何向。李曰。循山而東。奈何。公曰。南北步馬不相若久矣。眾寡勞逸。又懸。雖所在響應。作聲勢。實觀望。不能爲之助也。纔涉北地。與官軍交立。盡耳。徐又曰。向彼舍短用長者。委堅城。泝江而上。所過不畱。直趨荆襄。呼召滇粵三逆。藩與

之連結搖動江以南以撓官軍則禍甚於今日矣棄舟楫之便而敝攻圍故知賊無能爲也李公以是知公能二十年李公疏言鄭錦已死子克塽幼部下爭權征之必克因薦公素習海上情形可專任而總督姚公啟聖亦奏公能遂授福建水師提督加太子太保公至軍練水師又遣閒諜通其舊部曲使內應二十一年七月彗星見給事中孫蕙疏言征臺灣宜緩尙書梁清標亦以爲言有詔暫停進剿九月公疏言臣已簡水師精兵二萬戰船三百艘足滅海寇請飭督撫餽餉而獨任臣以討賊無拘時日但遇風利卽進兵詔如所請行公復請調陸路官兵隨征許之時克塽仍襲僞爵稱延平王事皆決之僞武平侯

劉國軒僞忠誠伯馮錫範猶恃海道險遠致書總督姚公言克  
塙願稱臣入貢不薙髮登岸如琉球高麗例姚公以聞

上不許趙公進師二十二年李公光地請告家居邂逅公逆旅  
中李曰眾皆言南風不利公出師故犯之何也公曰賈豎之言  
也夫北風日夜猛夜則更甚自此至澎湖縱能魚貫行幸而不  
散然島嶼悉賊踞未能一鼓奪之舟無泊處坐與行殊風濤震  
撼軍不能合也將何以戰夏至前後二十餘日風微夜靜海水  
平如練可以拋碇泊洋聚而觀變不過七日舉之必矣用北風  
者徒幸萬一南風則十全之算也然旬日間恐有颶風亦偶閒  
歲不起此則天意非人慮所及耳又曰賊將劉國軒爲彼魁傑

設以他將守澎湖。雖敗未卽服也。必用再戰。如守澎者爲國軒。或死或敗。則勢窮。膽裂矣。臺灣可不戰下。李喜曰。寇平矣。公笑曰。何信之深也。李曰。爲將者必識天時地理。且較將之智力。公兼之矣。能無平乎。六月。公由銅山攻克花嶼。猫嶼。草嶼。乘南風進泊八罩。國軒踞澎湖。築短牆。列火器。環二十餘里爲堅壘。公遣游擊藍理以烏船進攻賊船。乘潮四合。公乘樓船突陣流矢傷目。督戰益力。總兵吳英繼之。斬賊將及賊兵三千有奇。克虎井桶盤二嶼。旋以百船分東西路。遣總兵陳蟒。魏明等東指雞籠嶼。四角山。西指牛心灣。以分賊勢。公自督五十六船分八隊以八十船繼後。賊悉眾來拒。我軍聯檣而進。總兵林賢。朱天貴。

突入賊陣。八隊踴躍奮呼。東西兩路夾攻。波濤騰沸。自辰至申。焚賊船百餘隻。賊萬有二千。遂取澎湖。是役也。公以十四日發銅山。二十二日決勝。果在七日中戰之日。東南角微雲起。國軒方調遣拒敵。望見喜甚。旣聞雷聲殷殷。國軒推案起。歎曰。天命矣。蓋海行占風。以雲起爲風兆。聞雷則止也。國軒敗後。乘小舟歸臺。彎克塽等震懼無惜。乃乞降。公爲奏請。

聖祖許之。八月。公統兵自澎湖入鹿耳門。抵臺。彎克塽率其屬薙髮迎降。繳偽延平王金印。臺彎平。諭旨嘉公忠勇。性成。矢

心報國。加授靖海將軍。封靖海侯。世襲罔替。仍管水師提督事。遣侍衛賚御用冠服。賜之。公疏辭侯爵。優詔弗許。特

賞孔雀翎。命侍郎蘇拜往福建與督撫及公議善後策。時有議遷其人棄其地者。公疏言臺灣自古未入版圖。然中國之民潛往生息其間。不下萬計。海寇鄭芝龍始踞爲巢穴。明崇禎初。芝龍就撫。借與紅毛爲互市之所。順治十八年。鄭成功攻破之。盤踞其地。傳三世數十年。一旦畏威納土。此誠

天佑。

皇上以未闢之方輿資東南之保障。若棄其地遷其人。則此地原爲紅毛所有。萬一乘隙復踞。後患方長。伏思海氛旣靖。汰內地溢設之官兵。即可分防兩處。三年後開征濟用。內地可免轉輸。竊謂棄之必貽大患。守則永固邊隅。伏乞 乾斷。疏下議政。

王大臣會議仍未決

上召詢廷臣大學士李公蔚奏應如公請尋蘇拜及總督姚公亦如公議請設總兵等官及水陸兵並設縣三府一巡道一得旨允行尋詔授鄭克塽公銜劉國軒馮錫範伯銜俱隸漢軍其偽武職千六百有奇偽文職四百有奇降兵四萬有奇及明裔朱恆等命於附近安插墾荒二十四年公疏請申嚴海禁凡興販外洋應定船數每船仍酌定人數歸督撫提鎮責成汛官防範其採捕漁船亦使互相稽察以杜變端從之會歲饑公平糶賑卹全活百萬戶二十七年入覲賜朝服

上諭公曰爾前爲內大臣彼時尚有輕爾者惟朕深知爾待爾

甚厚。其後三逆蕩平。惟海寇游魂。尙爲閩害。欲除此寇。非爾不可。爰斷自朕衷。特加擢用。爾果能盡心竭力。舉六十年難靖之寇。殄滅無餘。誠爾之功也。近有言爾恃功驕傲者。今爾來京。又有言當畱爾勿遣者。朕思寇亂之際。尙用爾弗疑。况天下已平。又疑爾弗遣耶。今命爾復任。宜益加敬慎。以保功名。從來功高者。往往不克保全。終始皆不能敬慎之故也。其勉之。公以年衰乞致仕。優旨弗允。三十五年三月薨於位。年七十有六。贈太子少傅。賜祭葬。子諡襲壯。雍正十年。詔入祀賢良祠。子世范襲三等侯。

仲子世綸。字文賢。康熙二十四年。由任子授泰州知州。殫心職。



業有重臣來治河。從官某。強州民已聘女爲妾。君持之急立還。諸民餘眾咸遵約束。尋坐事降調。督臣傅臘塔以世綸清廉公直題畱得旨。畱任二十七年。湖廣兵變。援勦官軍過境。沿途侵掠。君具芻糧應之。而列槎以待。有犯者立擒治之。兵皆斂手去。明年擢守揚州。禁治遊俗。尙一變。會歲饑。力請興修范公隄。以工代賑。全活者多。

上南巡召對良久。顧左右曰。此天下第一清官也。調江甯。以父憂去官。乞畱者萬人。不得請。乃人投一文錢。建雙亭於府署前。名一文亭。累遷安徽按察。湖南布政使。湖南田田自丈量。後里役雖免。而正供外有徭費。歲漕外有京費。世綸盡革徭費。減京費。

四之一民立石頌之入爲太僕卿坐事免特旨授順天府尹  
令行禁止畿輔肅然再遷戶部侍郎五十四年出爲漕運總督  
禁需索革羨金劾貪弁除蠹役人服其公明五十九年陝西大  
旱饑轉河南粟二十萬石給關中詔世綸勘黃河運道乃自  
孟津歷砥柱上龍門由陝州達西安量地險易酌舟多寡因徧  
歷陝境發帑金倉粟賑饑秦民建生祠祀之君性警敏聽斷如  
神自司牧歷大吏清白自持始終一節以勞疾薨於位江泰淮  
揚並祀焉著有南堂集八卷奏疏若干卷

第六子世驃由行伍起家積戰功康熙四十七年擢定海總兵  
四十二年

上南巡 御書彰信敦禮匾 賜之累出洋巡輯海盜 溫諭

嘉獎 賜戴孔雀翎四十七年遷廣東提督五十一年調福建  
水師提督六十年四月奸民朱一貴自稱明裔偽號中興天下  
大元帥倡亂於鳳山縣之姜園戕總兵歐陽凱副將許雲等遂  
陷臺灣君聞報卽率所部進扼澎湖總督滿保檄總兵藍廷珍  
等以師會眾議三路進攻君以南路打狗港在臺灣正南南風  
正盛不可泊北路清風隙去府治百餘里餉道艱度賊必屯聚  
中路宜直擣鹿耳門時臺灣文武官均退回澎湖惟北路淡水  
營守備陳策堅守汎地君遣將赴援而自統師擣中路遣勁卒  
以小舟載旗幟先伏於南北港六月抵鹿耳門賊踞臺灣抗拒

君登樓船督戰發礮中賊貯火藥器火大熾賊驚潰眾軍齊進兩港悉樹我軍旗幟遂揚帆直渡鯤身鯤身者海沙也大舟不能過是日海水驟漲八尺舟行如飛遂復安平鎮明日破賊四千於二鯤身賊眾八千來拒復擊敗之遣守備林亮等由西港進游擊朱文謝希賢林秀等越七鯤身由鹽埕諸路奮勇登岸並趨府城君身先將士擊敗賊眾一貴竄遁遂復府治閏六月諸羅縣民楊旭等誘擒一貴及其黨翁飛虎等十二人縛獻大營一貴檻送京師磔於市逆黨俘斬殆盡臺灣平與襄壯公平臺口期先後符合 詔優敘有功將士 賜世驃東珠帽黃帶四團龍補服九月薨於臺灣軍營 優詔悼恤贈太子太保

賜祭葬諡勇果雍正元年

世宗特旨臺灣自古未屬中國

皇考以聖略神威取之載入版圖逆賊朱一貴等倡亂官軍威  
皇考教養之恩奮勇攻取七日之內剿滅數萬賊眾克全臺厥  
功甚偉茲仰副

皇考從優議敘之旨於現議甄敘外仍各加一等後不爲例提  
督施世驃可予一等輕車都尉子廷勇尋襲職其淡水營守備  
陳策卽以君薦超授臺灣總兵官

藍義山軍門事略

藍公諱理字義甫號義山福建漳浦人。生而魁偉虎頭燕頤。口可容拳力舉八百斤。足追奔馬能曳其尾倒行。少貧無以爲生。或勸爲染人尋發憤棄去持斧擊斮釭碎之。會海寇盧質擁眾岱嵩并尾閭時出劫掠公集族中雄傑者得十五人謀曰大丈夫當立功報國今盧質爲害鄉里我與若往殺之官以我爲能必聞於朝且用我矣皆曰善遂行得壯士五十人至岱嵩屯焉。盧質居井尾隔一江公傳言吾欲與質鬪質聞率眾三百至公大笑曰吾始聞若勇今乃知若怯若所恃二三百人耳使隻身與吾鬪吾擒若矣質喜曰有是哉遂各持盾攜短刀躍出鬪百

合莫能相勝負。質故有名。劇賊身長七尺餘。白皙長髯。揮刀盾如閃電。當者辟易。見公。少年心易之。至是。知爲勍敵。殫其技。終弗能勝。公度質氣且餒。忽虎吼曰。著矣。質愕然。趾出盾外。公截其趾。顛遂斬之。令其眾曰。降者免死。眾皆降。其副王都聞之。亦降。公將詣郡獻功。都請緩數日。實潛出劫掠。後以傷死。公始自詣郡。郡守聞公作賊。方戒嚴。公指天誓曰。言屠賊狀。弗信。逮下獄。雜羣賊中鞠治之。將斬。計五十有三人。議留一人。緩其死。命掣簽。公曰。死則死耳。何掣爲。羣賊以次掣。遺一簽於地。公曰。地上者。予我官。揭視之。生字也。由是五十二人皆斬。而公獨留。亡何。同繫者謀越獄。事洩。坐斬。將及公。迅雷忽作。晝昏。黑主者知。

其冤乃止。然終不獲出獄。公亦晏然無出意。日捫履以爲食。康熙十三年。耿精忠反。悉縱繫者。使受僞職。公不從。閒道走出仙霞關。聞康親王方統大軍討賊。公迎謁。具陳平閩策。王嘉其忠。命隨征爲鄉導。破僞都統曾養性於溫州。十五年。以功授建甯游擊。十七年。都統賚塔等敗海賊於蜈蚣山。復長泰。公皆爲軍鋒。又隨提督楊捷夾擊賊將何祐於烏嶼。大破之。遷灌口參將。灌口當孔道。軍興旁午。供億繁甚。閩督姚公啟聖方駐漳浦。每使過。有所誅求。公不應。且執而鞭之。由是過客皆譖公。姚公命公分兵守高浦。辭不赴。遂以虛兵冒餉劾公。削籍。擬杖徒。公有卒以鬪殺人當死。公憐其母寡無昆弟。自詣官曰。殺人者我也。



卒無罪。遂免卒而置公於理。在獄又經年。請勦海寇。自贖。上允之。發臺灣效力。當是時。朝廷以鄭氏父子竊踞澎臺。數侵擾漳泉。爲邊患。議大興師。命靖海將軍施公琅征之。施名將。雅知人。聞公忠勇。奏署右營游擊。部議持之。特旨報可。遂領前隊先鋒。公喜得遂報。國志曰。在廈門練水師。有二卒出市薪蔬。遇將軍戈什哈觀劇。使酒擒而撻之。且痛詆公。卒歸。愬公笑曰。鬪毆常事也。且問汝勝耶。負耶。卒曰。受撻耳。何勝負之足云。公怒曰。汝二戈什哈不能勝。何能殺賊。命斬之。卒呼冤曰。某等以將軍故。讓之請復。與鬪如不勝。願死。公縱之。再鬪。反命曰。大勝矣。公喜。命二卒臥板扉上。刺雞血淋之。昇以往。見將軍。

請發戈什哈二人者付公治。施公不可。公固請曰：「今用人之始，士卒不能愛軀命爲將軍出死力，將軍宜一體撫恤之。」戈什哈倚將軍勢，無故撻士卒，且大言辱詈某，損先鋒威重，搖惑軍心。將軍不發此二人付某治，恐軍士人人解體也。施公不得已，付之。公回營，具牒飛報將軍曰：「今日上吉，先鋒官啟行，卽詣海岸縛戈什哈二人，斬以祭江。」轟巨礮順風揚帆去。施公聞之不懌，旣而曰：「虎將也，必成功。」遂親統諸軍繼之。公帥師先抵澎湖，鄭氏將劉國軒曾遂等以數萬眾迎敵，戰艦蔽江。公鏖戰自辰至午，手殺八十餘人，身破十餘創。正酣鬪，忽賊礮斜飛過公腹。公偃曾遂呼曰：「藍理死矣。」公仲弟瑤從背後扶公起，公奮拳虎。

吼。曰。藍。理。在。曾。遂。死。矣。喚。草。茵。持。刀。來。連。呼。殺。賊。者。三。聲。如。震。  
雷。舟。中。軍。士。皆。氣。壯。無。不。一。當。百。草。茵。族。子。法。小。字。也。持。刀。授。  
公。見。公。腹。已。破。腸。出。於。外。血。淋。漓。爲。掬。而。納。諸。腹。中。公。四。弟。瑗。  
傳。以。衣。五。弟。珠。持。匹。練。連。腹。背。交。裹。之。公。大。呼。殺。賊。不。暇。顧。也。  
時。賊。船。競。進。以。鐵。鉤。鉤。公。舟。我。軍。亦。鉤。賊。舟。火。箭。火。彈。互。擲。煙。  
焰。障。天。賊。中。有。飛。天。鼠。者。抱。巨。桅。揉。升。而。上。銜。刀。負。蓬。立。將。躍。  
入。公。舟。公。弟。瑤。距。躍。斬。之。賊。奪。氣。我。軍。賈。勇。先。登。公。命。以。火。藥。  
盡。傾。賊。舟。焚。燹。賊。無。數。沈。其。巨。艦。二。賊。大。敗。逐。北。數。十。里。棄。械。  
浮。尸。盈。海。面。捷。聞。施。公。大。喜。疏。上。公。首。功。命。紅。毛。醫。治。公。創。醫。  
言。須。七。日。弗。動。氣。乃。可。平。復。未。幾。施。公。進。戰。戒。左。右。勿。使。公。知。

會官軍小卻。施公以大眾犁之過猛。舟閣淺沙。不能動。羣賊環焉。施公故善戰。神氣閒定。然終未得突圍出。公聞左右耳語。詰得之大驚。立往救。時諸將所乘舟皆書官銜姓氏於旗上。獨公舟止書藍理二字。字方廣各二丈。賊遙望見。相謂曰。藍某來矣。皆披靡。公飛盾躍過。偽中軍舟連斬巨魁十餘人。復躍而還。賊奪氣奮擊。大敗之。奪賊舟請施公更舟。施執手慰勞。且曰。醫言七日勿動氣。今方三日。何遽來。公笑曰。主帥有急。卽創裂以死。不顧也。遂與施公乘勝鏖擊。窮追賊首尾。不相顧。鄭克塽大懼。遂納土降。臺灣平。施上公首功。加左都督。以參將先用。尋丁憂。二十六年服闋入都。抵趙北口。遇

聖駕出水圍。將避道所。乘馬凝立。弗肯行。鞭之數十。不動。乃舍騎步入梁園中。駕至。遣侍衛問誰騎。公乃出。曰。臣藍理。從福建來者。

上問。是征澎湖時。拖腸血戰之藍理邪。公奏曰。是。

上曰。來何遲也。召至前。問血戰狀。解衣視之。爲撫摩傷處。嗟歎。

良久。復召至行宮。慰勞之。特旨授神木副將。賜帑金三。

百兩。未行。擢宣化鎮總兵。掛鎮朔將軍印。二十九年。調浙江定。

海鎮。在浙十餘年。權提督者四。每遇南巡。迎駕。或入都。

陛見。寵賚特有加。

聖祖嘗語諸王大臣。以公拖腸血戰狀。又引見。

皇太后曰此破壯總兵也視公若家人父子公每奏對皆侃侃直陳或手舞足蹈不自己

上嘉其真率御書所向無敵額賜之四十二年調鎮天津

賜孔雀翎及冠服尋以舊傷疾作請解任溫旨慰留賜御

醫診視公以畿輔產米無多而天津一望皆平原可開河引水灌稻田乃躬率兵士墾鑿得水田數百頃歲收豐稔

上悉以賜公賜名藍田爲世業四十五年擢福建提督御書

畫錦萱榮額賜其母蘇氏并書勇壯簡易額賜公調公弟

參將珠赴天津接管營田事公至閩日召故鄉父老飲道及微時顛沛狀歔歔太息慨然有廣廈萬間庇士之意時詢疾苦遇

胥役勢豪訟師土棍。悉關白當事。置諸法。親近者竟自治之。倡建江東大石橋二。捐金巨萬。不足。則以郡人之不孝不弟。及爲富不仁者。出罰鍰附益之。又大治街衢。拓其規制。常曰。以地方不義財。爲地方之利。可以勸孝弟。抑豪強。轉移風化。或曰。此有司事也。非所宜聞。公怒曰。天下官管天下。百姓腐儒。何足以知之。由是告訐者。踵至。差弁勾攝。趾錯於道。富人重足立。左右親暱。因緣爲姦利。利歸羣小。而惡名盡萃公矣。如公者。因刻匿名帖。繪一虎。以比公。多列罪狀。五十年。坐盜案落職。巡撫滿保。總督范時崇。據虎帖劾公。

上命侍郎和托。廖騰燧等往按。左右不肯承。公曰。吾大臣。何必。

辯舉筆署曰皆實議斬立決追贓入萬籍其產 特旨從寬免死調赴京師入旗籍五十四年大軍進剿策妄阿喇布坦公請赴軍前效力。

上以其驍勇練軍機 賜總兵銜協理北路軍務五十七年以病回京明年卒年七十有一

上追念公功 特旨免所追銀 賜公家屬出旗護喪歸葬公生平躁急性發如雷霆過卽忘之無藏怒宿怨每劇談大笑聲聞里許尤善罵人遇權勢赫奕出己上者輒挂侮之然遇才人傑士雖極寒賤必折節禮下以此人服其伉爽教家勤儉衣食粗糲無所擇家奴饜珍羞而草蔬敗肉反酉以待公公亦甘之



好書。筆。窠。大。字。濡。毫。伸。紙。有。求。無。不。應。者。諸。弟。皆。以。平。臺。功。加。左。都。督。瑤。功。最。多。未。仕。卒。瑗。至。金。門。鎖。總。兵。亦。喜。書。大。字。拳。能。入。口。揚。盾。一。躍。三。四。丈。珠。累。官。參。將。勇。不。讓。諸。兄。而。性。敏。嗜。學。能。背。誦。通。鑑。綱。目。不。遺。一。字。文。人。多。避。之。

許蓋臣少傳事略

許公諱貞字蓋臣閩之海澄人父炳嘗捐貲重建明倫堂又築陂引淡水以溉民田鄉人德之公初爲鄭氏將康熙三年率所部歸朝詔授左都督駐九江已而移駐贛縣墾荒爲屯田都督居久之滇黔變作湖湘諸郡皆陷而耿精忠反閩中出兵杉關廣信建昌撫州諸山賊蜂起應之州縣大半破沒精忠遣驍將賈振魯規取贛州以通楚寇陷石城圍甯都勢張甚虔人震恐公在屯閒發憤歎曰鼠輩猖狂乃至是乎大丈夫立功報國此其時矣遂以十三年五月二十四日起兵赴援時公閒居久部曲多散去衣甲器械不完而公常教人舞藤牌用挑刀人多

鍊習乃椎牛醢酒集屯丁諭以忠義聞者皆感憤得健卒四百率之行賊眾數萬營於黃坊所過無敢撓鋒者見公偏師前不爲意公大呼突陣跳盪無前藤牌軍一躍數丈人馬辟易搏戰數十合賊大潰斬首數千獲甲幟磁矢無算於是軍容始可觀乘勝解甯都圍復石城斬三千級八月賊圍興國急公馳救之立解勦雩都瑞金盡平天華長樂伍選白寺諸寨招降江背石賀諸寨賊眾數萬出難民三萬有奇屬有司加意拊循督撫交章上其功加太子少保時公威名日盛閩寇畏之遣辯士以高爵誘公致書進說公一不啟書械其使以聞顧遣閩人饒元結僞總兵張存端順存踞順昌以牽制延汀耿逆大患苦之於是

天子知公忠赤可大用擢公總兵轄湖東三郡駐節建昌以十四年六月視事未逾月復宜黃崇仁樂安三城初建昌爲賊踞安親王復而守之顧環城數十里皆賊賊屯麻姑山蕭家坪楊華芙蓉諸山寨無慮三四十萬逼城而軍眈眈下瞰王以爲憂公徐白王曰賊雖多易與耳請往破一寨以爲驗王尙未知公之能軍也姑應曰諾公出賊不意以夜二鼓疾馳勦蕭家坪冒險突上犁旦破之王晨召公不至聞其出勦也大驚惟恐失之已而公還獻捷乃大喜賜食慰勞於是王知公果可屬大事遂以建昌委公而身帥師自袁州進攻長沙畱滿兵五百公部卒僅二千賊聞大軍西行度城守益單以十二月二十八日併力

攻城一軍駐城東之沙坪。一軍駐城東南從姑山。一軍薄南門。城東多民廬。沙坪曠衍。他將請攻之。公不可。分遣裨將守南門。而自將銳卒。擣從姑山。山高。賊渠屯焉。不虞我軍猝至。倉皇迎戰。大敗走。而賊之攻南門者。方鴟張。公自山馳下。掩出其後。賊大驚。表裏夾擊。盡殲其眾。盱江爲之赤。自是賊膽落。不敢復議攻城矣。訊俘言。賊度官軍必攻沙坪。則出兵縻我。而從姑山之眾。下焚民廬。官軍不得還。城卽破矣。今驟攻從姑山。則沙坪之眾。弗能救也。諸將乃大服。麻姑山最高。賊數萬壁其上。環而塞者數十里。一擊百應。公默計。方春水發。溝澗皆成河。諸寨隔絕。乃可破也。於是按兵休士。就麻姑山麓平敞處。時時引兵習陣。

法賊初見兵來。以爲已也。擐甲執戈以待。公閱武畢。徐回。久之。賊亦懈。不爲備。春水暴漲。賊以浮橋相聯絡。公密具舟。積薪其中。十五年三月晦。公復出。閱兵士卒。皆不知將攻。麻姑也。抵山麓。忽引而上。直突賊營。賊分衆掠糧於外。畱寨者不意大軍猝至。惶駭不知所爲。而別校。薪舟絕其浮橋。他賊莫能救。一日破六十餘寨。積屍滿巖谷。煙焰塞天。於是南山賊皆盡。而城東二聖山。閩寇耿二營焉。其餘沙坪。紅門。梓木嶺諸賊。蜂屯蟻聚。不可爬梳。公計賊衆且有備。故緩攻以懈之。五月五日。當競渡。衆謂賊在近。請已之。公故縱龍舟往來。盱江置酒。張樂會諸將聚觀。賊熟視不敢出聲。息公益知賊虛實。遂以六月六日進。

勦二聖山。直擣中堅。賊所恃礮火弓弩。我軍肉薄而上。藤牌蔽身。矢石不能傷。長刀一揮。甲札皆徹。賊大敗。耿二踉蹌遁。連破四十營。斬馘無算。餘賊盡走入杉關。自王師西行。建昌危於累卵。公獨守孤城者七月。以疲卒二千當方張之賊數十萬。而胸有城算。整暇從容。卒能以少擊眾。官民倚公若長城焉。七月復金谿。南豐。八月復廣昌。九月復瀘溪。授雲騎尉。世職。十年破賊蓮塘。十一月援南豐。十二月復新城。追賊至杉關。於是湖東三郡無賊。而吉安寇韓大任者。驍勇有智數。號小淮陰。與官軍久相持不下。糧盡出走。以十六年五月入樂安。簡親王度攻大任。非公不可。檄公提師擊之。遇於跌水嶺。大任所將多邊關勁卒。

垂死猶反。關公與之一日入戰。彼此疲極。坐睡少頃。輒起復鬪。我兵益奮。寇不能支。奔甯都。眾猶二萬。屯都湖。立木城。畫堊而守。公攻圍兩月。寇出挑戰。輒不利。乃棄城遁。公星馳追躡。蹙之於永豐。又蹙之於黃塘虎峒。賊眾死亡畧盡。乃入閩。投康親王軍前乞降。以公窮追力戰故也。十七年春。平廣昌。藤弔楓樹二寨降。僞將饒大武等五十餘人。兵民五千有奇。二寨舊稱天險。四面懸崖。攀藤猿掛而上。頂寬平。可容數千家。有池不竭。粟支數年。公乃營於對面永安山。多製火器。會天大風。發礮焚其廬。賊升屋救火。遙縱火筒擲之。不得上。須臾灰燼。賊窮乃乞降。先是麻姑二聖之賊。旣滅。公念餘黨不足窮捕。遣人四出招撫。僞



總兵揭斯進。僞將軍楊玉太。僞都督余雄等。先後受撫者三十餘輩。計將吏千餘人。兵卒數萬。其或抗命。亦不遽加兵。徐曉諭之。初過廣昌。僞將軍劉汝桂等。不就撫。而潛遣人入營偵探。公引令遍行營壘。曰。吾軍虛實。悉汝觀之。歸語汝將。欲降則降。不降善守。汝寨吾今未加兵。俟軍還。攻汝必矣。宜固守某險。要不能守而破者。玉石俱焚。其毋悔。廣昌民欲薙髮。公曰。徐之吾未能畱兵。去賊復至。必僂汝。吾歸滅賊。汝薙髮未晚也。民皆感激泣下。汝桂等服公威信。亦率眾出降。公仁而有度。皆此類也。諸山寨初或恃險不卽降。及藤弔楓樹平相顧。詔曰。二寨猶破。吾屬尙不降。無噍類矣。是年秋。璽書褒獎。晉提督兼轄饒州。

南昌吉安凡六郡。其冬命提督全省軍務所部將領許自辟置不拘成例異數也。劇賊江機楊一豹駐江潯山爲巢。四出標掠。公會師勦之。自錢村入。賊立木城爲三關。深溝堅壁。兵不得進。寨後有高山。公遣人閒道攀援至山頂。下瞰賊巢。第苦乏水。飢疲不能復鬪。乃命截竹爲筒。盛斗水。人負一筒。裹乾飯。宵行。黎明至山巔。飽餐以待。賊望見。上山迎鬪。我兵乘高擊之。賊披靡多墜崖谷死。乘勢至寨後。鳴角聲。礮賊守關者聞之。謂官軍已入寨。皆散走。大軍長驅而進。盡犁其巢。賊首走雞公山。猴子嶺。封禁山皆絕險。人跡所不到。輒躡其後襲破之。又走洪山。洪山有黃巢殿。自昔官軍無至者。公又破之。斬一豹弟一虎及僞官。

二十有五賊兵二千有奇。十八年四月，追賊至江潯山，卽賊巢。爲營，賊謀夜劫營，公誦得之，令鑿地三尺，以其土壘垣三尺，城塹立，就土露刃，植立垣下。戒賊至，毋得出聲，而別遣將伏林莽中。賊果夜至，忽見垣塹，嶄然大驚，發火見垣內，白刃如林，惶怖反走。伏兵出，賊狂竄，相蹂躪死，進破詹源老巢，追斬萬六千餘級。機一豹等亡入閩，納款康親王軍前，論功，加公世職騎都尉，兼一雲騎尉。二十二年，調廣東提督，公自起兵至是，首尾九年，凡遷官四，加銜一，加級五，予世職三大功，奏聞者二十餘次，其餘戰績不可勝紀，惟

天子嘉公忠勇，召入

陛見，褒勞再三，公叩首言

國家洪福

主上天威。臣何功之有。

上問在某處某處殺賊幾何。公又叩首言。臣逢賊便殺。不記多少。

上笑而領之。知公樸誠。益重公。公爲人廉謹和易。謙退不伐。平居左圖右書。接對士大夫。恂恂儒雅。不知其爲元功宿將也。持軍嚴整。禁部下勿掠。勿淫。勿殺。降勿俘。良民每出軍。以郡縣僚吏偕行。破賊得難民婦女。輒憐置別室。屬吏謹視之。遣還其家。破寨得積穀。令軍民隨力負取。軍敢奪民。僇以徇。凡收復城邑。他將有議攻山寨者。公曰。方亂。民結寨自保。不皆賊也。止勿攻。所全活不可勝計。以故江右人深德公。家祠戶祝。思慕不少衰。

云論者謂自三藩倡亂。東西交訌。潭岳撫信之賊中。相隔閩者。虔州一綫地耳。公崛起屯閒。扼其吭。使賊連雞之勢不成。遂乃偏師橫驚。霆擊風驅。令麻姑玉笥閒空。無賊巢。王師得以開長沙。掃滇孽。而粵閩二寇。縮爪鈴牙。坐困井底。同歸灰滅。公之功在社稷。不細矣。公治粵十四年。造哨艇。設水塘。晝夜巡戢。盜賊屏跡。山海晏然。三十四年三月薨於位。贈少傅。賜祭葬。如禮。其騎都尉兼一雲騎尉世職。注入贛州衛。子鳳朝。孫克寬。作哲。遞襲三次。例應停。乾隆中。特予雲騎尉世襲罔替。